

## **Wosheetso P'awlos Wosho Efeson Ashuwots Maants Kindo**

P'awlos Efeson dats ashuwotssh b́ guut'ts wosh jamoniyere shino b́ t'iwintsir «Ik'o b́ k'umtso b́wotit daronat datsatse fa'a azeets jamo kakweyar Krstos s'uz shirots bowotit aawo b́bodore» (1:10) etiru asaabiyatsne. Aaninwere Iyesus Krstosnton ik wotde'er ash naar jamo iko bowotitwok'o k'umts enan finats bo jitsitwok'o Ik' ashuwotssh gawiyetkee.

Ephesonsh wosheets wosh shints kayo guut'tso ik woti jango dek' b́twtso gawintsdek't, Ik'o niho b́íashwotsi aawk'on galb́dek'tsok'o, b́ naay Iyesus Krstosn bomorrosh orowa eto daatsr aawk'on bos'ayinetwok'onat Ik'o een wotts b́ jángiyits aap'o shayiri S'ayini weeron aawk'on ariko b́bek'shtsok'oni b́kitsiri, Gitli kayotse ando aani guut'tso nababirwots ikwotde bobewotse Krstosn bodetsts ikwoto arik b́wotitwok'owa boosh b́gawiyir.

Ashuwots Krstosnton bodetsts ik woton aawk'o ik woto bodetstsok'o k'osh k'osh jewri keewon kitsere, Ik' moowu atsok'o b́ wotor Krstos atsatsi tokok'owiye, Ik' moowu mook'o b́ wotor Krstos b́ gúratsi shúts eenok'owiye, Ik' moowu moogenk'o b́ wotor K'rtos moodonzk'owiye, wosh han guut'tso Krstos weeron be'ets Ik' deero ayidek't adt b́ keewor dashan gop'at wok wotts kitsone b́ bek'shiri, jam keewono b́ s'iilir Krstos

shunone, b tooke beshide'er b imon, b maac' k'ewon, b deeronat b jenok'one.

### **Jamon mas'aafan bdetstso**

Kindo 1:1-2

Krstosnat Ik' moon 1:3—3:21

Krstosn andr beyo 4:1—6:20

B guúpo 6:21-24

<sup>1</sup> Ik' shunon Iyesus Krstossh woshek wottso P'awlosoke, Iyesus Krstosn amanek wottswots, Efesonitse beyiru S'ayinwotssh.

<sup>2</sup> No nihi Ik'onat nodoonz Iyesus Krstosokere s'aatonat jeenon itsh wotowe.

### *Krstosn daatseyiru shayiri deero*

<sup>3</sup> Darotse fa'a shayiri deer jamo Krstosn noon deertso no doonz Iyesus Krstos nihi Ik'o údewe.

<sup>4</sup> S'ayinonat eeg eego deshawwotsi wotaarr b shinatse nodaatsetwok'o datsu b azeftsere Krstos weeron noon gal bdek'i.

<sup>5</sup> Ik'o b geetso sheeng keew b wottstotse Iyesus Krstos finon b nanaúwotskok'o no wotish bale noon marat'bdek'i. <sup>6</sup> Hanowere b k'al bshune na'o weeron beenon noosh b imts mang wotts s'aato b úditwok'owe. <sup>7</sup> Ik' s'aati s'eenatse tuutson b naay s'atson keeweyat no morrosh orowa eto daatsrone. <sup>8</sup> B s'aatono ayidek't noosh kuut're, danonat dani teleefonowere, <sup>9</sup> Ik'o b shuntso Krstos weeron bali b k'úmtsok'on ááshat teshts bshunman no danetwok'o woshre.

<sup>10</sup> Dúri s'uwi aawo b bodor Ik'o finats b jitsts b k'úmtsman daronat datsatse beyiru azeets

jamwots ko'ide'er ik s'uzo Krstos shirots bo wotitwok'o b woshiti.

<sup>11</sup> Jam keewo b took shunok'on finiru Ik'o bali b k'úmtsok'on Krstos weeron b jirwotsi no wotitwok'o noon marat'bdek'i. <sup>12</sup> Man bwotwere Krstosi jangon shintswotsi wottswots noo Ik'o b mangosh no úditwok'owe.

<sup>13</sup> It it kashosh doo shishi aap' wottso ari aap'o it shishor Krstosi it amani, mank'o bí itsh imosh jangit b teshts S'ayin shayri matabo itats togk'rere. <sup>14</sup> Shayiranwere b mango údosh b wotitwok'o Ik'o bík wotts jamwotsi b kashifet-sosh nodaatsit naatosh dets nodek'tsoniye.

*P'awlos Efeson ashuwotssh Ik'o bk'ontsok'o*

<sup>15</sup> Eshe doonzo Iyesusatse it detsts imnetiyonat S'ayin jamwotssh it detsts shuno shishat, <sup>16</sup> itn Ik' k'onon gawfetsat it jangosh Ik'osh údo t'intso need'iratse. <sup>17</sup> Mango bish wotitwo no doonz Iyesus Krstos nihi Ik'o ayide'er it danetwok'o dani teleefonat bek'i shayiro itsh b imetwok'o Ik'o k'onitwe. <sup>18</sup> Aaw naari jangosh it s'egetsok'onat S'ayinwots bo naatet mang wotts ristiyo aawk'o ayi b wotok'o it danetwok'o it nibi ááwo b sháánetwok'o Ik'o k'onitwe. <sup>19</sup> Tatsdeshaw bí angi eeno noosh amanirúwotssh aawk'o een b wotok'o it danetwok'o Ik'o k'onitwe, <sup>20</sup> Bí anigi eenano finats bjiitsi k'irots tuzdek't darotse b k'ano maants b beetzso Krstosne. <sup>21</sup> Ik'o niho Krstosi darotse b k'ano maants b beez aaw naari algoniyere, aloniyere, naashoniyere, angoniyere, doonzwottsonat shúúts jamoniyere

damb aaninwere datsan s'uzats b woterawo weet datswatsnorniye. <sup>22</sup> Jam keewo b aali shirots woshdek't bish bkeewiyi, Ik' maatsnowere jamoniyere damb b wotitwok'o tooko bin b woshi. <sup>23</sup> Ik' moowniye bi atsuniye, jamo b jamon s'eentsitwo bin s'eenon kiitsitwaniye.

## 2

### *K'iroitse kasho maants k'ay kimi jango*

<sup>1</sup> It it daadonat it morri jangosh it shayiri beyon k'irk itne it teshi, <sup>2</sup> Manoor datsanatsi gond sha'ok'owa it sha'efoni, aaninwere jongatse fa'a shayiri angwotsi keewirwosha it alefoni, biwere and azazeraw ashuwotsatse finiru kim shayironiye. <sup>3</sup> No jametswere haniye shinon bo dagotse no meets shunok'onat no maac' gawirwo shoydek'at sha'at no meets tewnok'o beyaatniye no teshi, k'oshwotskok'o no azeewon Ik' fayi shirotsne noteshi.

<sup>4</sup> Ernmó Ik' maac' k'ewo ay b wottsonat noosh b detsts shuno een b wottsatse tuutson, <sup>5</sup> No morron k'irk nowotiyaluru Ik'o Krstosnton kashetswotsi no wotitwok'o woshre, it kashwere b s'aatone. <sup>6</sup> Ik'o Iyesus Krstosnton k'iroitse tuuzt daritsi beyokoke binton noon bbeezi. <sup>7</sup> Han bk'alwere Krstos Iyesusn noosh k'eshdek't bkiitsts doowonat binton nutsiyetwo deshawo s'aati gaalo weet durwotsitse noosh kitsosha etniye. <sup>8</sup> It it kash imneti weeron wotts s'aatone, manwere Ik' ima bako itokikaliye. <sup>9</sup> Konwor asho

b́ id'aawok'owa, kashiyit s'aato b́daatse finon-aliye, <sup>10</sup> Noo Ik'o bal b́k'anits sheengo finefetsr nobetuwok'o Krstos Iyesus weeron aaniyi azeets Ik'i aztswots noone.

*Krstosn daatset ikwoto*

<sup>11</sup> Mansh eshe, bal it shwewon Ik'i ash woterawwotsi it teshtsok'o, Ayhdiwots ash kishon gofo boamtsosh it'fetst itsh gof amawwotsi ett boc'ashfok'o, <sup>12</sup> it Israe'el ashuwotsnton gonke deshawwots, Ik'o b́í ashuwotssh b́jangitswtsats need'iyets aap'i taarwotssho ib wottswots, dat-sanatsnowere it jangiru ik keewalonat Ik'alón beyirwots, manorowere Krstosatse wokat it teshtsok'o gawde'ere. <sup>13</sup> Andmó it haniyere shin wokat teshtswots Krstos Iyesusn wotdek'at b́s'atson t'inrte. <sup>14</sup> Noon k'ált teshtso fayi girgido b́meetson gáákt Ayhdiwotsnat Ik'i ash woterawwotsh ik woshtso nojeeno Krstosiye. <sup>15</sup> Git jirmanotsitse b́inton ikwotitwo ik handr asho azosh Muse nemi tzaziyonat b́ niwwotsi gaakt jeeno b́woshi. <sup>16</sup> Mask'aliyatse k'irtnwere s'aaleyar beyo k'aaúbazre, gitetswtsnowere ik atso woshdek't Ik'ontón maniree. <sup>17</sup> Waatnwere, wokat teshtswotssh itnat karnt teshts ayhudiwotsshowere jeen dooshiy aap'o nabre. <sup>18</sup> B́iyatse tuutson no gitetswor ik shayiron jishey r nihok t'inetwone.

<sup>19</sup> Mansh eshe it S'ayinwotsnton ik datsi ashuwotsnat Ik'i maa ashuwots itna bako haniyere okoon ibonat ashdatsi ashuwots itnaliye. <sup>20</sup> Woshetswotsnat nebiywotsh need'itsats agerte, ageyiru maamansh

tungúshatse shutswotse kaatsde detset shúts kup'o Iyesus Krstosiye. <sup>21</sup> Maa eenmanu b́ jamon b́n ikok desheyarr doonzo S'ayin Ik' moo wotarr eenetwe. <sup>22</sup> Ik'o b́ shayiron bits b́ beet moo wotosh itwere Krstosn tohaar ageetute.

### 3

#### *P'awlos Ik' ash woterawwotssh b́ fint sok'o*

<sup>1</sup> Itsh Ik' ash wotserawwotssha etaatni taa P'awlos Krstos Iyesussh tipetso t woti. <sup>2</sup> Itsh t sheengshitwok'o Ik'o b́ s'aaton fini gowo taash b́ imtsok'o arikon shishrte. <sup>3</sup> Bal k'awnon itsh t guut'etsok'o Ik'o ááshts man taash k'eshdek't kitsre. <sup>4</sup> Itsh t guut'tsan it nababor Krstosko ááshts keewo taa t t'iwintstsok'o danosh falfte. <sup>5</sup> Ááshts keewanwere Ik' shayiron S'ayin woshetswot-snat nebiyiwotssh and b́ be'etsok'on beshts dúrwotsatse teshts ashuwotssh be'eratse. <sup>6</sup> Manwere b́ kitsir Ik' ash woterawwots ayhudiy-otsnton b́ rstiyo naatetuwoatsnat ik atsi kaywotsi wotar Ik'o b́ imts jangosh dooshishi weeron Krstos Iyesusnton kayitwotsi bo wottsoniye.

<sup>7</sup> Ik'o b́ angi finon taash b́ imts s'aaton taawere doo shishiyansh finru guutso wotere. <sup>8</sup> Taa S'ayin wotts jamwotsiyere t múk'iyaluru dab́ daar deshaw Krstos gaalo manwere doo shishiyo Ik' ash woterawwotssh t shishiish Ik' s'aato taash b́ imi. <sup>9</sup> Mank'o beshts dur jamwotsatse jam azts Ik'on ááshat teshts Ik'o b́ beetzso eeg b́ wotok'o jamosh t kitsitwok'o s'aato taash imere. <sup>10</sup> Manwere b́ wot and dúranatse Ik' maa weeron daaratse fa'a alirwotsnat naashwotsn Ik' dan

teleefo bí ar arok'on bo danetwok'owe. <sup>11</sup> Ik'o no doonz Krstos Iyesusn han findek't b's'eents dúre dúrosh b' k'úmtsok'one. <sup>12</sup> Krstosk no wottsonat bín no amantsosh Ik' shinatse ááwu shúk'onat imneityon t'inosh falfone. <sup>13</sup> Taa it jangosh t dek'iru gond bek'o it mangoshee b' wotiti, mansh t gond bek'i jangatse tuutson it ango b'neferawok'owa etaat itn k'onirwe.

### *Krstos shuno*

<sup>14</sup> Eshe Ik'o Niho shinats t gubron tuk'umalde'k'aat Ik'o t k'onir han jangoshe. <sup>15</sup> Daronat datsatse fa'a ik ik maa asho koni b' wottwok'o b' daatsit Ik'okne. <sup>16</sup> Ik'o it gitsitsi atso kúp'shit ango b' shayiri weeron b' mangi gaalon b' imetwok'o Ik'o k'onitwe. <sup>17</sup> Mank'owere Krstos imnetiyon it nibots b' betwok'onat itwere s'ap'ar shunon kúp' it wotitwok'o Ik'o k'onitwe. <sup>18</sup> Ando aani Krstos shuno b' gaawnonat b' genzon, danmban b' tuwonat dashan b' gop'on, awúk'o b' wotok'o S'ayin jamwotsnton s'eenon t'iwintso falr, <sup>19</sup> ash danoniyere bog wotts Krstos shuno it danetwok'o Ik'o b' s'een jamon s'eenosh it bodetwok'o Ik'o k'onitwe.

<sup>20</sup> Eshe mansh noyitse finirwo bí'angi weeron nok'onirwonat nogawirwoniye danmb ayide'er bogshde k'alo falitwo Ik'o Izar Izewer, <sup>21</sup> bish Ik'i moonat Krstos Iyesusn dúr jamon dúre dúrosh mango wotowe!, Amen.

## 4

### *Atso ik bwotok'o*

<sup>1</sup> Eshe doonzosh t fintsoh tipeets wottso taa, it s'eegets s'eegosh geyik wotts beewon it beetwok'o

itn k'onirwe. <sup>2</sup> Shunon it took tookon k'amefetsr tooko dashan detson maac' nefonat faleyon beewere,. <sup>3</sup> Jeenon it atsatsayo deshede'er Ik' shayirotsē daatseyiru ik woto kotosh kúp'owere. <sup>4</sup> It s'eegeyor ik jángosh it s'eegetsok'o ik atsonat ik shayiro fa'ee. <sup>5</sup> Aaninuwere doonz iko, imneti ikonat gup iko fa'ee. <sup>6</sup> Dabnwere jamoniyere damb wottso, jamotse wotde finitwo, jamotse beetwo, jamosh nih wottso ik Ik'o Izar Izewer fa'ee.

<sup>7</sup> Ernmó Krstos imosh bí ettsok'o bodtso no took tookosh s'aati imo noosh imere. <sup>8</sup> Mansh S'ayin mas'afotsere,

«Damb keshor mus'o mus'dek'tni bí'ami,

Ashuwotsshowere imuwotsi k' imi» eteet-sok'owiye.

<sup>9</sup> Beree «Dambaan k' keshi» etiru aap'an shini shin datso maants, datsotsnoru ayidek't dashan wotts beyok k' ot'tsoni bako k'osho eebi k' kit-siri? <sup>10</sup> Dashan ot'tsanwere bí jamo s'eenosh dar jamoniyere damb keshtsoniye. <sup>11</sup> Bíwere ik ikwotsi wosheetso, ik ikwotsi bek'etswotsi, ik ikwotsi doo shishiyo nabitwotsi, ik ikwotsi amantsuwotsi jinetwotsi, ik ikwots dan-itwotsi bowotitwok'o imuwotsi boosh k' imi. <sup>12</sup> Hanowere k' al amantswotsi kirstani finosh k'anir Krstos ats wotts Ik' moowu bí agetuwok'owe. <sup>13</sup> Ando Ik' na'o danon imnetiyon daatseyiru ik wotok bodroone, Krstos s'ayinonat s'een k' wottsok'o noowere ik wotde s'een asho no wotitwok'owe. <sup>14</sup> Haniyere okoon ashuwots gondonat ant'elcosh k'andek'ts dani jong-



onat aats fundon hake bako gifnide'er daamet nanaúwotskok'o woteratsone. <sup>15</sup> Dab maniyere aro shunon keewfetsr jam keewon took wottso Krstos maants eenetwone. <sup>16</sup> K'osh k'osh atsi kaywots bodesh Krstosne, ats jamonwere ikok b́ deshee shas'wotsne, eshe ik ik atsi kayo b́sh eteets fin sheengshde'er b́ finor ats jamo b́ eneti, shunonowere b́ kup'iti.

*Krstosn daatset handr beyo*

<sup>17</sup> Haniyakon, k'awntsalkew gawirw Ik' ash woterawwotskok'o beek'ayere etaat doonzo shútson it tooko kor it dek'etwok'o itsh keewre, <sup>18</sup> Bo asaabiyo t'aluwtskee, bodaronat bo k'elikúp'i jangosh Ik'o boosh b́ imts beyatse k'alernee. <sup>19</sup> Jitso bot'ut'tsosh kim jamo k'alosh bo tewnirwotse botoko meets tewunosh beshidek't imrne. <sup>20</sup> Itmó Krstos jango hank'owaliye it dani, <sup>21</sup> Arikon b́ jango shishrte, aronwere Iyesusitse b́ fa'ok'o b́n danrte, <sup>22</sup> Mansh antelchde'er morro maants jishit Woteraw tewno shini b́n it beyiru nat wotts it azeets doyo okaan juu bayere. <sup>23</sup> It nibonat asaabiyon b́ jamon handr wotowe, <sup>24</sup> Arik wotts kááwonat S'ayinon Ik' arok'on azeetso handr atso tahade'ere.

<sup>25</sup> Eshe kooto keewk'ayere, no jamets ik atsi kaywotsi no wottotse no ats atsewo ari keewo keewwone. <sup>26</sup> Fayore! it fayonomo morro fink'ayere, it fayetsok'on it befere aawo ilk'aye. <sup>27</sup> Dablossh b́ kindit fúro imk'ayere. <sup>28</sup> Ump'irwo

haniyak úmp'k'aye, dab kic'tswotssh b́ imish gizo b́ daatsitwok'o b́ kishon sheeng fino finowe. <sup>29</sup> B́ jamon it nonotse woteraw keewo keshk'aye, maniyere dab shishetwotsi geneúshitwonat kup'shosh wotitu keewo ashu-wotssh keewwere. <sup>30</sup> It kashts aawo b́ kiitst-wok'o wotitwo it ats jot'ets Ik' S'ayin Shayiro shiyantik'ayere. <sup>31</sup> S'aam woto, nib k'úno, fayó, kúúho, c'ashonat kon naari gond jamo it atsere okaan wokowe. <sup>32</sup> Maniyere it ats atseyosh doowwotsnat maac' nefwotsn, shiyanitwotsnat imetwotsi wotoore, Ik'o Krstosn it morro itsh orowe b́ ettsok'o it were it atsatseshosh orowe erre.

## 5

### *Shanotsi beyo*

<sup>1</sup> Haniyere okoon shuneets nanaúotsskok'o itwere Ik' shuuts sha'irwotsi wotoore, <sup>2</sup> Krstos noon b́ shuntsok'onat Ik'o geneúshit sheeng sháák' detsts imonat woshó woshdek't b́ kasho noosh beshidek't b́ imtsok'o itwere shunon beewere,.

<sup>3</sup> Han naari keewan Krstiyaniyosh b́ geyira-wotse wido wee kon naari kiimo wee jaalo itokere shishek'aye. <sup>4</sup> Maniyere dab Ik'osh udo t'intswere bako iritwonat dárts ash keewo, wee aatsni keewu keewo itesh woteratse, hank'o keewan itsh geyiratse. <sup>5</sup> Gobetso b́ witiyal, kon naari kim fin finiruwo b́ wotiwal, wee woteraw Ik'o ik'iyok'o wotts jaalo b́ wotiwal, Krstosnat Ik' mengstotse bano b́ dashawok'o dande'ere.

<sup>6</sup> Keewanotsatse tuutson aleraw ashuwotsats Ik' fayó b́ wetwotse konwor woteraw keewon itn ant'elck'aye. <sup>7</sup> Mansh aleraw ashuwot-  
snton ik wotk'ayere, <sup>8</sup> Yoots it t'alwwotsiye it  
teshi, andomo doonzok it wotsosh sháán itne  
mansh sháánon beyiru ashuwotskok'o sha'ore.  
<sup>9</sup> Doo jamo, kááwonat ari shuwo b́ daatset  
shááanokne. <sup>10</sup> Mansh doonzo geneúshit keewo  
eeg b́ wotok'o p'ec'ar s'iilere. <sup>11</sup> Shuu deshaw  
t'alwi finonton ik wotk'ayere maniyere shááno  
maants kishde'er kitswere. <sup>12</sup> T'alwotse beyiru  
ashuwots ááshon bok'aliru keewo keewonwor  
dab jiitsike. <sup>13</sup> Jam keewo shááno maants b́  
woor eeg b́ arok'o shiratsne b́ be'eti. <sup>14</sup> Shiratse  
be'eyiru jamo shááne, mansh,  
«Nee tokrirwono tuuwe! k'irtswotsitse galeyar  
tuuwe!

Krstoswere neesh c'eeshitwe» eteere.

<sup>15</sup> Eshe aawk'o it beyirwok'o t'iwintsde'ere dan  
teleef danetswotsk'owa bako danteleef deshaw-  
wotskok'o beek'ayere. <sup>16</sup> Dúran gond b́ wottstotse  
itsh imets aawo b́ besheraniyere bín finore.

<sup>17</sup> Mansh doonzo shuno eeg b́ wotok'o  
t'iwintswere bako dartswotsi wotk'ayere.

<sup>18</sup> T'afiyo maants itn b́ dametwotse woyiniyon  
dutssets bíron mashk'ayere, maniyere S'ayin  
Shayiron s'eenere. <sup>19</sup> Duubonat udon, Shayiri  
jááwonowere it ats atsewo keewewere, it  
maac'otse kishde jááwar duwr doonzo udoore.  
<sup>20</sup> Jam keewosh no doonzo Iyesus Krstos shútson  
jam aawo Ik'o Niho udoore.

### *Kenihonat máátson*

<sup>21</sup> Krstos mangosha err ititsere iko ikosh alewee.

<sup>22</sup> Máátswotso! doonzo Iyesussh it aleyrwok'o it kenih kenihosh alewere, <sup>23</sup> Krstos bí ats wotts Ik' mowush took'onat bin kashitwo b'wottsok'o kenihonwere b' máátsush tooke. <sup>24</sup> Ik' moow Krstossh bi aleyirwok'o máátswots jam keewon bo kenihosh alewne.

<sup>25</sup> Kenihwotso! Krstos Ik' moowu b' shuntsok'onat b' tooko bish beshidek't b' imtsok'o itwere it máátswotso shunere, <sup>26</sup> Krstos han b' k'al Ik' moow S'ayintsosh geeyatniye, b' S'ayintswere b' aap'iweeron aatson mashdek'tniye. <sup>27</sup> Hank'on kiimo wee shiits aak'o wee han arts k'osh gond keewo biyatse b' datserawo S'ayinat biyatse eeg eeg deshaw sheeng woshdek'tniye b' maants b' t'inti. <sup>28</sup> Eshe kenihwots bo tooko boshunirwok'o bo mááts máátso shunne, b' máátsu shunirwo b' tooke b' shuniri. <sup>29</sup> B' took atso shit'etwo konwor aaliye, dab Krstos Ik' moosh b' k'alirwok'o b' manziti, b' dugniti. <sup>30</sup> Noowere Krstos atsi kaywots noone, <sup>31</sup> «Hank'on asho b' nihinat bindn k'ayir b' máátswats b' deeshiti, gitetswotswere ik atse bowotiti» eteere. <sup>32</sup> Ááshts keewanwere eene, hanowere t etir Krstosnat Ik' maats aridek'atniye. <sup>33</sup> Ernmó keewan itne b' s'iliri, mansh kenihó b' máátsu b' tookok'o woshde'er shune, máátswotswere b' kenih mangiwye.

---

**5:22** 5:22 K'ol. 3:18; 1 P'et'. 3:1      **5:25** 5:25 K'ol. 3:19; 1 P'et'. 3:7      **5:31** 5:31 Aze. 2:24

## 6

### *Ind nihonat nana'i jango*

<sup>1</sup> Nana'úwotso! doonzo shinatse geyitk b'wottstotse it ind nihosh alewere. <sup>2</sup> «Nnihnat nindn mangiwe» etiru alo jangiyets aap'o bítse detsts shints tzaziyo haniye, <sup>3</sup> Han nk'aliyalowere «Jam keewo neesh kááwitwe, datsanatsnowere nkasho genzitwe.»

<sup>4</sup> Itwere nihwotso! doonzo Iyesusn boosh niwo danifetsr, kiitsfetsr fayefetsr ditswere bako itnana'i nibo k'úni k'ayere.

### *Doonzwotsnat guutswots jango*

<sup>5</sup> Guutswotso! meetson itsh doonz wottswotssh shatonat k'ewon k'éwewere, Krstossh it aleyirwok'o itnibi kááwon boosh alewere. <sup>6</sup> It aletwere Ik'i shuntso it nibon finiru Krstos guutswotskok'o wotde'erni bako asho geneúshosh be'ewosha err wotk'aye. <sup>7</sup> Ashosh b'woterawo doonzosh finirwotskok'o wotde'er it shunon shengshde'er finore. <sup>8</sup> Guutso wotowa nas' wotowa b'took tookon b'fiints sheeng finosh doonzoke b' k'awntso deketk b'wottsok'o danfte.

<sup>9</sup> Itwere doonzwotso! ash shiitso s'iilr boga bogshrawo itnat boonsh doonzo darotse b'beyirwok'o gawfetsr sheefo k'ayk'rar it guutswotssh sheengo k'alwere.

### *Ik'oke daatset kes'i k'ac'wotsi*

<sup>10</sup> Eshe haniyere okoon doonzonat bí angi eenmann kup'ore, <sup>11</sup> Dabilos shoobi fino k'efo itfalitwok'o Ik' kes'i k'ac' jamo tahde'ere. <sup>12</sup> No

kaareyo ashuwotsnton b'woterawo t'aluts dúranatse kewirwotsnton, naashwotsnat datsatsi angwotsnton man etonwere darwotsitse fa'a kim shayirwotsntoniye. <sup>13</sup> Eshe gond aawots t'alati ango k'efo it falitwok'onat jametswotsi b'jamon ishr kup'ar need'o it falitwok'o Ik'o kes'i k'ac' jamó k'aa'úde'ere!

<sup>14</sup> Eshe haniyak arikeewo znaarok'o it gebaats edde'er, kááw wotono t'ururiyok'o\* tahade'er, <sup>15</sup> C'aamo geddek'ts wotadarok' jeeni doo shishiyo itdek'tso nabosh k'ande'er need'ore. <sup>16</sup> Jamaniyre danbono taw lalwok'o aat'efre sha'iru diyablos gin jamwotsi bín t'afiyosh it falitwo imnetiyo geepok'o k'aa'úde'ere. <sup>17</sup> Kash daatsonowere tookats gerdek'ef k'uriya eteetsok'o it tookats gup'sh de'ere, iknwere S'ayin shayiratse daatset shiki gorado bíwere Ik'o aap'etso deshde'ere. <sup>18</sup> Uni aawo S'ayin shayiron jishefetsr Ik' k'onon t'intswere. Mank'oon Ik'o S'ayints b' dek'ts ashuwotssh it baterawon kup'ar Ik'o k'onwere. <sup>19</sup> Dooshishiko ááshts keewo shatalon kishde'er t keewor geyit aap'o keewosh t falituwok'o taashowere Ik'o k'onwere. <sup>20</sup> Andoor habiliyon tipeyat dooshiyansh woshek taane, mansh ááw shuk'on tkeewitwok'o taash Ik'o k'onwere.

### *S'uwaatsi jamo*

<sup>21</sup> Shuneets eshwonat doonzo Iyesus finat-snowere amanets guutso wottso Tikik'os t jango

---

**6:14** 6:14 Isa. 11:5; 59:17      \* **6:14** 6:14 T'ururiya: Eto kes'o amewor gerats kardek'ef gino asho b' koyawok'o bazitke.      **6:15** 6:15 Isa. 52:7      **6:17** 6:17 Isa. 59:17      **6:21** 6:21 Wosh. 20:4; 2 T'im. 4:12

aawk'o b'wottsok'onat eeg t finirwok'o jam keewo itdanetwok'o itsh keewitwe. <sup>22</sup> Mansh noo aawk'o nowottsok'o itdanetwok'o aaninwere it-noor b'kup'shitwok'owa etaat bin it maants woshere.

<sup>23</sup> Ik'o nihonat doonzo Iyesus Krstos jeenonat shunon imnetiyonton eshwotssh wotowe.

<sup>24</sup> K'ut'eraw shunon no doonz Iyesus Krstosi shunts jamwotssh s'aato wotowe.

**Handr Taara**  
**The New Testament in the Borna Language of**  
**Ethiopia (Handr Taara)**

copyright © 2018 The Word for the World International

Language: Borni (Borna)

Contributor: The Word for the World Southern Africa

**Handr Taara**

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412